



«Նոր ժամանակի կրթություն» ՀԿ

*ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ
ԴԱՍԸՆԹԱՑ*

*ԱՎԱՐՏԱԿԱՆ ՀԵՏԱԶՈՏԱԿԱՆ
ԱՇԽԱՏԱՆՔ*

*Հետազոտության թեման՝ Էպոսի դերը հայրենասիրության և
ազգային արժեհամակարգի ձևավորման գործում*

Առարկան՝ Հայոց լեզու

Հետազոտող ուսուցիչ՝ Նաջարյան Աննա

*Ուսումնական հաստատություն՝ Ն.Վ. Գոգոլի անվան համար 35
հիմնական դպրոց*

Երևան 2022

ԲՈՎԱՆԴԱԿՈՒԹՅՈՒՆ

Ներածություն	3
Էպոսի դերը հայրենասիրության և ազգային արժեհամկաարգի ձեկավորման գործում	6
Էպոսի դասավանդման հետազոտական ընթացքը	10
Եզրակացություններ և առաջարկություններ	16
Օգտագործված գրականության ցանկ	18

ՆԵՐԱԾՈՒԹՅՈՒՆ

Հետազոտության արդիականությունը: Ներկայումս համատարած նկատում ենք հոգևոր և բարոյական արժեքների անկում, հայրենասիրական զգացմունքների բացակայություն, պետության ներկա իրավիճակի բնորոշ և անհանգստացնող գծեր և հատկապես երիտասարդների շրջանում: Ներկայումս էպուր և սեփական արմատների և ուժի ճանաչումը մեծ դեր է խաղում երեխաների հոգեբանական դաստիարակության, ազգային արժեհամակարգի, հայրենասիրության բարոյահոգեբանական ձևավորման վրա: Այդ է պատճառը, որ Հայ գրականության դասերի ընթացքում առավել մանրակրկիտ է ուսումնասիրվում «էպոս» դասըթացը և լրացուցիչ ժամանքանակ է տրամադրվում նյութն առավել ըմբռնելի դարձնելու համար¹:

Հետազոտության նպատակը: Հետազոտության նպատակն է բացահայտել հայկական էպոսի դերը հայրենասիրության և ազգային արժեհամակարգի ձևավորման գործում, թե ինչպիսի առանձնահատկություններով է օժտված:

Հետազոտության օբյեկտը երեխաների արժեհամակարգի ձևավորումն է էպոսի միջոցով:

Հետազոտության առարկան հայկական էպոսի համատեքստում երեխաների դաստիարակության միջոցներն են:

Հետազոտության վարկածն այն է, որ աճող սերնդի՝ հայ մանկավարժական գաղափարներին, փորձին ու ավանդույթներին համահունչ դաստիարակությունն առավել լիարժեք և արդյունավետ կիրականանա, եթե՝

1. մանկավարժության համատեքստում ուսումնասիրվեն և համակարգված ներկայացվեն աճող սերնդի ընտանեկան դաստիարակության ու

¹ Գրական ստեղծագործություն. վերլուծության ուղիները և սկզբունքները, Երևան, 1983թ., էջ 158

միջսերնդային փոխհարաբերությունների վերաբերյալ պատմամշակութային տարբեր ժամանակաշրջաններում հայ և արտերկրի մշակույթի գործիչների հայացքները ինչպես ներկայացված է էպոսում,

2. Ուսումնասիրվեն և վեր հանվեն հայկական էպոսում առկա մշակութային և ընտանեկան դաստիարակության փորձը, գաղափարները, միջոցները, վերլուծվի և հիմնավորվի ներկայումս ընտանեկան դաստիարակության գործընթացում դրանց կիրառման նպատակահարմարությունը:
3. Բնութագրվեն և մեկնաբանվեն ազգային արժեհամակարգի ձևավորման առանձնահատկությունները ժամանակակից աշխարհում որոնք մեծ դեր են խաղում դաստիարակության համար, հիմնավորվեն էթնոմանկավարժության մեջ ընտանեկան դաստիարակության կենսունակ փորձի կիրառման հնարավորություններն աճող սերնդի ընտանեկան արժեհամակարգի ձևավորման գործում:

Հետազոտական աշխատանքի խնդիրներն են՝

- Դիտարկել էպոսի դերը և առանձնահատկությունները երեխաների դաստիարակության գործում,
- Բացահայտել դրական կողմերը,
- Կերպարների օգնությամբ ի ցույց դնել ազգային րժեհամակարգի ձևավորման գործոնները

Հետազոտական աշխատանքի գործնական և տեսական նշանակությունը:

Ուսուցչի կողմից կազմակերպված խաղերը նպաստում են սովորողի հետազոտական, ստեղծագործական, նախաձեռնողական, ինքնակազմակերպման, ժամանակի արդյունավետ կառավարման հմտությունների ձևավորմանը և հնարավորություն են տալիս նրանց ինքնուրույն կամ մյուսների հետ համատեղ աշխատանքի շնորհիվ գործնականորեն կիրառել դասի ընթացում ձեռք բերած տեսական գիտելիքները և դրսևորել իրողությունները քննադատաբար

ուսումնասիրելու, վերլուծելու, ստեղծագործական նորարար մոտեցումներ կիրառելու ունակություններ:

Հետազոտական աշխատանքի կառուցվածքը:

Հետազոտական աշխատանքը բաղկացած է ներածական մասից, հիմնական մասից, եզրակացություններից և առաջարկություններից, ինչպես նաև օգտագործված գրականության ցանկից:

ԷՊՈՍԻ ԴԵՐԸ ՀԱՅՐԵՆԱՍԻՐՈՒԹՅԱՆ ԵՎ ԱԶԳԱՅԻՆ ԱՐԺԵՀԱՄԿԱԱՐԳԻ ՁԵՎԱՎՈՐՄԱՆ ԳՈՐԾՈՒՄ

Սասնա դյուցազունների չորս սերունդներն էլ բնութագրվում են հայրենիքին ու ժողովրդին անձնուրաց ու անմնացորդ նվիրվածությամբ, նվաճողների և բռնակալների նկատմամբ հետևողական վճռականությամբ մղած պայքարով: Հազարամյակներ շարունակ անհավասար մաքառումների մեջ սեփական գոյության իրավունքը հաստատելու համար մղած պայքարն են ներկայացնում նրանք՝ պահպանելով մեր ազգային արժեքները, որոնք ժամանակի ընթացքում փոխում են իրենց ձևը, բայց բովանդակությունը նույնն է մնում²:

Հատկապես Սասունցի Դավթի կերպարի միջոցով սիրելի հերոսի սխրագործությունները պատկերելիս ժողովուրդը ազատություն է տալիս իր երևակայությանը, հիպերբոլիկ պատկերներով պանծացնում նրան: Իսկ բռնակալ Մելիքին և նրա կամակատարներին սպանիչ ծաղրով է ներկայացնում:

Ասվում է, որ մեր էպոսում ամրագրված արժեքները դեռևս պահպանում են իրենց կենսունակությունը (վկան՝ ապրիլյան քառօրյա պատերազմը): Հետևություն են անում, որ այսօր ինչ կատարվում է, էպոսի մեջ դրա հիմքը կա: Բերում են օրինակներ:

Համեմատում են դրական և բացասական կերպարներին՝

- ուժի տեսակետից (Դավիթ և Մելիք),
- երդմանը հավատարիմ լինելու տեսակետից (Արմաղան, ապա՝ Խալիֆ և Մելիք):

Իրենք են առաջարկում համեմատության այլ հիմքեր և տալիս պատասխաններ: Խոսում ենք մեր հերոսների նկատմամբ վերաբերմունքի մասին (էպոսում, այսօր):

² Մկրյան Մ., Հայ հին գրականության պատմություն, Երևան, 1976 թ., էջ 71

Նկատում ենք, որ կա միտում՝ մեր մեջ եղած ուժեղին թուլացնելու: Էպոսից Խանդութի երկրպագուների կողմից Դավիթին խմեցնելով թուլացնելու օրինակն են բերում, այլ օրինակներ՝ մեր պատմությունից և այսօրվա իրականությունից:

Էպոսի գաղափարական գծերից է ազատասիրությունը: Այնտեղ ազատությունը ներկայացվում է որպես բնական իրավունք ամեն մի մարդու համար:

Հերոսները, պաշտպանելով իրենց ազատությունը, ուրիշներին չեն զրկում այդ իրավունքից: Մասունում բոլորը հավասար են և ազատ: Իրենց համար հատուկ կարգավիճակ մարդկային որևէ խմբում (ընտանիք, ազգակիցներ, համերկրացիներ և այլն) չեն էլ գիտակցում, ուր մնաց՝ պահանջեին: Նրանք ազատ էին ու վեր մարդկանց ստեղծած արհեստական օրենքներից:

Աշակերտներին առաջարկում եմ կարծիքներ փոխանակել ազատության մասին այսօրվա պատկերացումների շուրջ:

Էպոսի գաղափարական գծերից է ազնվությունը: Ազնվությունը նպատակին հասնելու ուղիղ ճանապարհն է մեր հերոսների համար: Նրանք ազնիվ ու անկեղծ են և՛ իրենք իրենց, և՛ այլ մարդկանց հետ հարաբերություններում: Ազնվությունից է ծնունդ առնում նրանց մարդասիրությունը: Էպոսում բազմաթիվ են օրինակները, որոնք գտնում են և ներկայացնում աշակերտները:

Ազնիվ աշխատանքով են ապրում մեր էպոսի հերոսները: Մասունում չկար մարդու շահագործում մարդու կողմից: Երբ աշխատավոր մարդիկ լսում են, որ Մասունում հարկ ու տուրք չեն վերցնում, բոլոր կողմերից գնում են այնտեղ: Մասնա դյուցազունները վերացնում են հարկերը, ոչնչացնում կողոպտիչներին, իսկ կողոպուտը վերադարձնում ժողովրդին: Նրանցից ոչ մեկի մտքով անգամ չի անցնում նույնիսկ պարտված թշնամու ունեցվածքին ձեռք տալ: Դավիթը Մելիքին սպանելուց հետո նրա զորքին ազատ է արձակում, ինքը վերադառնում է Մասուն՝ մի սայլի վրա դրած տանելով միայն Մելիքի ականջը՝ որպես նրա ոչնչացման ապացույց, ոչ թե ռազմավար:

Մեր դյուցազունները բնութագրվում են և փոխադարձ հարգանքով ու հանդուրժողականությամբ, սիրելիների նկատմամբ ջերմ հոգածությամբ ու անմնացորդ սիրով:

Խաղաղասիրությունը, խաղաղ կյանքով ապրելու գաղափարն է մեր դյուցազուններին մղում պայքարելու ոչ միայն հայ ժողովրդի, այլև ընդհանրապես մյուս ժողովուրդների համար: Էպոսում զարգանում է այն գաղափարական գիծը, որ ժողովուրդներն իրար նկատմամբ թշնամանք չունեն, թշնամություն հրահրողները իշխողներն են³:

Էպոսում համամարդկային գաղափարներ են ներկայացվում. խաղաղության պայքարը պատերազմի դեմ, կառուցման պայքարը՝ ավերման դեմ, արդարության պայքարը՝ անարդարության դեմ:

Հարուստ ու բազմազան են էպոսի գաղափարական բովանդակության այս կամ այն գիծը ներկայացնող օրինակները: Դրանք դուրս են գրում և ներկայացնում աշակերտական խմբերը, որոնցից յուրաքանչյուրին հանձնարարվում է գաղափարական բովանդակության մի գծի վերաբերյալ էպոսից բերել օրինակներ:

Գաղափարական բովանդակությունն ուսուցանելիս շեշտում եմ, որ մեր հայրենիքը մեր քրիստոնյա էությունն է, աստվածատուր մեր ինքնության կերպը, մեր տեսակը, որ պիտի կրենք: Հայրենիքի ոչ միայն տարածքային-նյութական ընկալում պիտի ունենանք, այլև հոգևոր: Հայրենիքը մարդկանց տվյալ հանրության հոգևոր աշխարհի կերպն է:

Գաղափարները, որոնք ներկայացվում են էպոսում, այն դարձնում են մեր ժողովրդի ինքնության վկայագրերից մեկը և մեր ժողովրդի՝ էությամբ քրիստոնյա լինելու ապացույցն են:

³ Ջուհարյան Թ., Հայ գրականության մեթոդիկա, Երևան, 1980 թ., էջ 97

Դարեր շարունակ էպոսը կրթել է մեր ժողովրդին՝ տալով նրան կատարյալ մարդու իր իդեալը՝ մանկական մաքուր պարզություն (անաղարտություն), արժանապատվություն, արդարամտություն, վեհանձնություն ունեցողին, որ նաև մարդասեր է, այլասեր, ժողովրդասեր, խաղաղասեր, ազատասեր, հայրենասեր, բարեկամասեր, եղբայրասեր և չարի դեմ պայքարող:

Մեր էպոսը մարդկության ստեղծած ամենահանճարեղ գեղարվեստական գործերից է: Նրա մեջ ամփոփված գաղափարները կենսունակ են այսօր և հետագայում էլ կուղղորդեն մեր ժողովրդին դեպի կատարելություն: Աշակերտները, բացահայտելով էպոսի գաղափարական բովանդակության հիմնահարցերը, կունենան տեսլական՝ ինչպիսի՞ն դառնալ, դեպի ո՞ւր շարժվել: Չէ՞ որ մեր այսօրվա իրականությունը, մեր հեռուստահաղորդումները, մթնոլորտը այն բարեբեր հողը չեն, որտեղ պիտի ծլի ու աճի հայի տեսակը: Մատաղ սերունդը օղի պես կարիք ունի՝ սնվելու մեր ժողովրդական բանահյուսությամբ, մեր դասական գրականությամբ ու արվեստով:

ԷՊՈՍԻ ԴԱՍԱՎԱՆԴՄԱՆ ՀԵՏԱԶՈՏԱԿԱՆ ԸՆԹԱՑՔԸ

Հետազոտական աշխատանքի համար ընտրվել է 10-րդ դասարանը, որտեղ սովորողների թիվը 20 է:

Դասարան` 10-րդ

Դասի թեմա` «Էպոս»

Դասի նպատակը` Խաղի միջոցով դասի սերտում և կարծիքների քննարկում:

Արժեքային համակարգ` ձևավորել ընկալելու և գնահատելու կարողություն:

Խնդիրները`

- Աշակերտների մոտ ձևավորել թիմային աշխատանքի կարևորությունը,
- Կիրառել ձեռք բերված գիտելիքները, կարողությունները և հմտությունները:

Վերջնարդյունքը` Խաղի ավարտին ներկայացնել արդյունքները:

10-րդ դասարանում էպոսի ավելի խորացված ու համակողմանի ուսումնասիրությունը հնարավորություն է տալիս ավելի շատ ուշադրություն դարձնելու նրա գաղափարական բովանդակությանը, բացահայտելու ժողովրդական այս հոյակերտ կոթողի նյութը, վեր հանելու նրա ասելիքի հիմնահարցերը, դաստիարակելու աշակերտներին դյուցազնավեպի ոգով⁴:

Չնայած էպոսի գաղափարական բովանդակության ուսուցմանը առանձին ժամ ենք հատկացնում, սակայն այն անցնելիս առաջին ժամից իսկ աշակերտների հետ հանգամանորեն, շերտ առ շերտ բացահայտում ենք գաղափարական բովանդակությունը` կապված տվյալ ժամին անցնելիք թեմայի հետ (սյուժե, կերպարների վերլուծություն և այլն): Իսկ գաղափարական բովանդակությանը

⁴ Հակոբջանյան Ա., «Սասունցի Դավիթ» էպոսի գաղափարական բովանդակության բացահայտումը («Հայոց լեզուն և գրականությունը դպրոցում», Երևան, 1982 թ., թիվ 1), էջ 57

հատկացված ժամը հնարավորություն է տալիս նախորդ ժամերին ասվածը համակարգելու, նոր բացահայտումներ կատարելու և ընդհանրացման համար⁵:

Նախքան էպոսի գաղափարական բովանդակությունը հանգամանորեն բացահայտելը պատկերացում ենք տալիս այս ժանրի մասին, ընդհանուր գծերով ծանոթացնում այլ ազգերի էպոսներին:

Հետաքրքիր է, որ նյութի ուսումնասիրության ընթացքում երեխաները հարց են հղել՝ թե ինչու այսօր էպոս չի հորինվում, պատասխանում ենք, որ էպոս հորինվում է մարդկության մանկության շրջանում:


Ապա շարունակում ենք քննարկումները մեր էպոսի ստեղծման ժամանակաշրջանի, նրա մեջ գաղտնագրված գաղափարների, բարոյական սկզբունքների, մեր ժողովրդի կողմից մարդու և մարդկայինի մասին պատկերացումների, ժողովրդի հավաքական կենսավորձով վավերացված մշտնջենական արժեքների մասին ենք խոսում, շեշտում, որ այդ արժեքները յուրաքանչյուր դարաշրջանում ընկալվում և իմաստավորվում են յուրովի:

Դասարանը կահավորում ենք էպոսի թեմաներով ստեղծված նյութերով՝ Հ.Կոջոյանի նկարների,




⁵ «Սասունցի Դավիթ. Հայ ժողովրդական հերոսավեպ», Երևան, 1981 թ., էջ 94

Հր.Քոչարի «Սասունցի Դավիթ» արձանի վերաստությունները, գրքեր (Էպոսի տարբեր հրատարակություններ,



գրական մշակումներ՝ Թումանյանի «Սասունցի Դավիթ»-ը, Բսահակյանի «Սասնա Մհեր»-ը, Չարենցի «Սասունցի Դավիթ»-ը, Հ.Օշականի «Սասունցի Դավիթ թատերգությունը»): Պատերիին փակցված պաստառներին մեծերի խոսքերն են էպոսի մասին: Օրինակ՝ «Ոչ մի բանի մեջ ժողովուրդներն այնքան պարզ ու պայծառ չեն երևում, որքան էպոսում» (Հ. Թումանյան):


Մինչ էպոսի ուսումնասիրության ավարտը դասասենյակի՝ էպոսին հատկացված անկյունում ավելանում են աշակերտների՝ էպոսի թեմաներով արած նկարները, ստեղծած տիկնիկ-կերպարները:



Թղթապանակների մեջ աշակերտները հավաքում են իրենց գրած ռեֆերատները, շարադրությունները, մտքերը, բանաստեղծություններն էպոսի թեմաներով: Աշակերտների մի խումբ էլ աշխատում է էպոսից իրենց ընտրած հատվածի բեմականացումը պատրաստելու համար: Կատարվում են այլ աշխատանքներ ևս:

Կարևորում են «Մասնա ծռեր» դյուցազներգության նյութի, ստեղծման ժամանակաշրջանի, ուսումնասիրողների կարծիքների մասին գիտելիքներ տալն աշակերտներին:

Քանի որ աշակերտները նախօրոք՝ ամռան ընթացքում, կարդացել են էպոսը, իրենց տեսրեքում նշումներ են կատարել, անդրադարձել կերպարներին, համառոտ ներկայացրել նրանց, նախորդ դասարաններում էլ հատվածներ են անցել էպոսից, հանձնարարվում է ստեղծել էպոսի տեսր, որտեղ կատարում են տարբեր աշխատանքներ: Օրինակ՝ որպեսզի ստուգեմ՝ արդյոք կարդացել են էպոսը, դիմում եմ տարբեր մեթոդների: Հանձնարարում եմ էջը ուղղահայաց բաժանել երկու մասի: Տալիս եմ առաջադրանք՝ համեմատել հին և նոր էպոսները, ապա գրել ընդհանրությունները (Վենի դիագրամ մեթոդ):



Հին էպոս ենք պայմանականորեն համարում ժողովրդական բանահյուսությունից մեր անցած նախորդ նյութերը՝ Գողթան երգերը, առասպելները՝ ամբողջացրած «Վիպասանք» վերնագրի տակ: Հանձնարարում եմ համեմատել հին և նոր էպոսներում ժողովրդական մտածողության դրսևորումները և այլն: Աշակերտները հիմնականում կարողանում են արտահայտել իրենց մտքերը:

Քանի որ էպոսի ուսուցումը նախատեսված է 10-րդ դասարանում, և քանի որ պատանիներն ավելի շատ են հակված ինքնուրույնության, ուստի աշխատում եմ պատրաստի մեկնաբանություններ և գաղափարներ չտալ, այլ իրենց՝ աշակերտների միջոցով բացահայտել էպոսի գաղափարական բովանդակությունը:

Գիտենք, որ մեր ազգի՝ իբրև տեսակի գոյության հիմքը հայրենասիրությունն է, որը լավագույնս դրսևորվում է էպոսում: Հայրենասիրությունն էպոսի կերպարների համար առիթից առիթ ի հայտ եկող երևույթ չէ: Դա նրանց առօրյա կեցության ձևն է և դրսևորվում է նրանց բոլոր արարքներում՝ օտար զավթիչների դեմ մղած կռվում, երկրի շենացմամբ զբաղվելիս, հասարակական անարդարությունների դեմ պայքարում, հանուն ընտանեկան ավանդույթների պահպանման գործունեության ժամանակ, նույնիսկ բարկության և կամ քնարական տրամադրության պահերին: Բոլոր դեպքերում նրանք չեն կորցնում իրենց մարդկային կերպարը. արդարամիտ են, վեհանձն, մանկական մաքուր պարզությամբ, բռնության դեմ՝ անողոք:

ԵԶՐԱԿԱՑՈՒԹՅՈՒՆՆԵՐ ԵՎ ԱՌԱՋԱՐԿՈՒԹՅՈՒՆՆԵՐ

Ազգային էպոսը նկարագրում է տվյալ ազգի կամ էթնոսի ծագումը, զարգացումը և պատմությունը: Այն նաև օգնում է փոխանցել ազգի ինքնորոշման կամ ինքնաճանաչման դրվագները և բազմաթիվ ազգային խորհրդանիշների առաջացման պատմությունը, ինչպես նաև հնարավորություն է տալիս երեխաների դաստիարակվել ազգային ոգով:

Սույն հետազոտական աշխատանքից հան գել ենք մի շարք եզրակացությունների՝

- Հայկական մշակույթում «Սասնա ծռեր» ազգային էպոսն առանձնահատուկ տեղ է գրավում: Այն ծնունդ է առել Հայկական լեռնաշխարհի ամենագողտրիկ անկյուններից մեկում՝ Սասունում:
- Բոլոր ազգային էպոսներն իրենց առջև դնում են պետականության խնդիրը, և եթե այն չունի պետականության խնդիր, ապա այն էպոս համարվել չի կարող: Հայկական ազգային էպոսում պետության և պետականության խորհրդանիշը համարվում է բերդը: Բերդի և հզոր պարիսպների կառուցումով էլ հենց էպոսի առաջին գլխավոր հերոսները՝ Սանասարն ու Բաղդասարը սկիզբ են դնում Սասնա տոհմին և Սասնա տանը:
- Էպոսում նկարագրվող պատմական իրադարձությունները տեղի են ունենում արաբական տիրապետության ժամանակ, և նկարագրվում է սասունցիների պայքարն արաբ նվաճողների դեմ: Որոշ պատմական իրադարձություններ ու հերոսների անուններ համընկնում են: Սակայն պետք է նշել, որ հայկական էպոսի արմատները հասնում են հազարամյակների խորքը, երբ մարդն ուներ ամենապարզունակ ապրելակերպը: Այն իր մեջ խտացնում է պատմության տարբեր ժամանակահատվածներ ու մշակութային շերտեր:

Հայկական Էպոսում հիշատակվում են թագավորը, իշխանը, հոգևորականը և ռամիկ ժողովուրդը: Սակայն նրանք բոլորն իրենց նիստ ու կացով, բարքերով և կրթությամբ գրեթե չէին տարբերվում: Թագավորը և ժողովուրդը մտերմիկ հարաբերությունների մեջ էին միմյանց հետ: Մասունցիները սիրում էին իրենց տերերին: Նրանց միջև միակ էական տարբերությունն այն էր, որ մեկը հրամայողն էր, իսկ մյուսը՝ լսողը:

«Սասնա ծռեր» էպոսը մեզ հաղորդում է հսկայական տեղեկություններ հայ ժողովրդի ապրելակերպի, ընտանիքի, ներընտանեկան և հասարակության մեջ փոխհարաբերությունների, կրոնական ընկալումների, ծիսական արարողակարգերի և հավատալիքների մասին:

Նյութից կարող են անել հետևյալ առաջարկությունները՝

- Էպոսի դասավանդումն իրականացնել պլանային ծրագրով և կրկնողությունների ժամանակ կրկին անդրադառնալ Էպոս թեմային,
- Համեմատել մյուս ազգերի էպոսների հետ, տանել համեմատականներ,
- Ներկայացնել թե որ այլ ազգի էպոսի հետ են ասոցացվում «Սասնա ծռեր» էպոսի հերոսները, կրկին տանել համեմատականներ:

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Գրական ստեղծագործություն. վերլուծության ուղիները և սկզբունքները, Երևան, 1983թ.:
2. Գրիգորյան Գ., Հայ ժողովրդական բանահյուսություն, Երևան, 1980 թ.
3. Հակոբջանյան Ա., «Սասունցի Դավիթ» էպոսի գաղափարական բովանդակության բացահայտումը («Հայոց լեզուն և գրականությունը դպրոցում», Երևան, 1982 թ., թիվ 1):
4. Մկրյան Մ., Հայ հին գրականության պատմություն, Երևան, 1976 թ.:
5. Ջուհարյան Թ., Հայ գրականության մեթոդիկա, Երևան, 1980 թ.:
6. «Սասունցի Դավիթ. Հայ ժողովրդական հերոսավեպ», Երևան, 1981 թ.: